



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 8

AFSPA ajanga reshikangshir, tetsür dak tashiyim
inyaker aser tepseter: Agatha Sangma

Germany chancellor atema
Olaf Scholz shimogo



VOL. XIX NO. 62 (ADOK 62) DIMAPUR YANGTEPNÜ (THURSDAY) LUCHII (DECEMBER) 09, 2021

₹ 5.00

Mon DC-i curfew nung temelenshi metetdaksür

Dimapur, December 8, 2021 (TYO): Mon jila nung CrPC kübok Section 144 ozüing agüja aliba December 7, 2021 nungi tera melenshiogo ta Mon DC, Thavaseelan K, IAS-i ashi.

December 7 nungi aonung 8 ako nungi anepdang 4 ako tashi dang curfew alitsü. Iba mapang nisung 5 dak teimba adenshitsu

memelar aser non-essential garitem senzütsü noktanger, ta pai metetdaksü.

Mon nung Night Curfew aliba ajanga tetsükdaksü ajururtemi 8413092131 / 9402842502 / 7005701862 / 9436018226 number tem ajanga tongteptsü akok ta paisa shisem.

General Rawat, pakinungtsü asernisung 11 tsükset

New Delhi, December 8, 2021 (Agencies): Bodbar anüingdang India nung mezüingbuba Chief of Defence Staff General Bipin Rawat aser pa kinungtsü Madhulika Raje Singh na den nisung 11 helicopter lendong nung tsükset.

Tamil Nadu kübok Coonoor anasa Indian Air Force helicopter lendong atalok.

Arishi küm 63 tain General Bipin Rawata aser kinungtsü nati jala ana- Kritika aser Tarinina toktsür asü.

Iba lendong nung nisung ka dang kümzük aser paji Group Captain Varun Singh lir. Pa ya Military Hospital, Wellington nung anepaludar.

February 3, 2015 nü Nagaland kübok Dimapur nung Bipin Rawat-i Cheetah helicopter lendong ka nungi jenbua liasü. Iba mapang pa lieutenant general liasü.

"Iba lendong nung Gen Bipin Rawat, Mrs Madhulika Rawat aser nisung 11 asüba osang kanga sasaa metetdaksür" ta IAF-i sangdong ka nung ashi.

Tasürtem rongnung Rawat indang defence assistant Brigadier LS Lidder aser pa staff officer Lieutenant Colonel Harjinder Singh na dena liasü, ta parnokisa ashi.

Russia nung yangluba Mi-17V5 helicopter nung nisung 14 mena liasü.

(Maneni tapak 2 nung...)

Congress MP tem Mon-i meyokba atema lungkak ait

Jorhat, December 8, 2021 (Agencies): Assam kübok Jorhat District Magistrate, Ashok Kumar Barman-i MP tem- Gaurav Gogoi, Jitendra Singh, Ajoy Kumar aser Anto Antony nung Jorhat adena

meyoki sota ayu.

Nagaland nung CrPC indang section 144 (2) kübok curfew benoka aliba agi parnok meyoktsü ta Jorhat District Magistrate-i ashi.

(Maneni tapak 2 nung...)

Alemlü tekolak bushiba ama inyaksü akok: Oting Citizens



(Abelen nungi) Driver amenba tsütsü injang agi akhaba angur aser iba ajanga Centre sorkar aser Defence Force ajanga ashibaji tai ta kuli agütsür. Para commandos-i amshiba gari ka nung number plate taila aika amshiba angur.

Dimapur, December 8, 2021 (TYO): Nagaland kübok Mon district nung Oting nungeri Bodbarnü December 4, 2021 nü lendong atalokba indang osang tejangja metetdaksü dang parnok taküm samatsü metsübur aser tsükkhir taküm agitsü ta shiogo.

"Onoki Oting Village nung Longkhao/Yatong indang osang tejangja menur ang metetdaksüba atema aser media o public dang tai maket arishi küm 40 teküpok nisung 13 tepsetba indang osang tai mebelenshi ayongzükür" ta Oting Citizens indang Office ajanga sangdong ka nung ashi.

"December 4, 2021 lendong sülen Oting nungeri alemlü tekolak atangba mapang amatu inyaksüsa akümsü. Onok nütsüing ishika dang saka onok taküm samatsü metsübur aser tsükkhir taküm agitsü" ta parnoki ashi.

Honibar nikongdang 3:30 ako meta nakmati aturtem pick-up truck ka nung mener Deobar sentep nung adentsü aser anisüingzüktsü atema kidangi meyipa arutsü aputsü. Nikongdang 4:30 ako meta sepaitemi iba gari nung mena alirtem maitsü jangjatsü memerangi injang khaloktsü, ta Oting Citizens-ia ashi.

Sepaitemi iba lenmang shibang aser garitem dang kangabo

mesenzüba Pioneer road leni aotsü tuyu. Injang khatokba osang angashiba sülen yimdaklirtemi district administration nem osang sangoktsü. Iba mapang joko aonung 7:00 ako meta liasü aser 8:00 ako tashi nung matatetba agi yimdaklirtemi pick-up truck aser lanurtem bushitsü apuso, ta parnokisa ashi.

Bushitepa aodang yimdaklirtemi lanur 8 amenba pick-up truck angu aser driver amenbalen injang akhaba angu. Iba ajanga sepaitemi tamasa gari driver dak injang khaloktsü aser iba sülen tangar dak khaloktsüba kuli sayur.

Iba mapang sepaitemi gari asem nung mener tesem toktsür jena oya liasü saka yimdaklirtemi parnok menep aser asüingdangya asü. Mezüingbo parnoki pick-up truck nung amenba lanurtem indang kecha memetet ta ashi saka yimdaklirtemi parnok garitem repringdang sepai ketdangsur ka tarpaulin tema nung mena liasü. Yimdaklirtemi tarpaulin telunglen lapoka repringdang lanur 6 indang tasüingdang liasü aser parnok ya süoshi shitak masem liasü. Sepaitemi parnok anasa prangpong yutsüba den camouflage uniforms aser boots semtsür telungpurtem ta sayutsüba tasa liasü, ta Oting Citizens sangdong nungsa metetdaksü.

Gari nung lanur 2 maliasü aser iba jagi yimdaklirtemi tena indang mangji sepaitemi tangalen yutsü asütsü ta bilem. Sepaitemi aser yimdaklirtem tsüingda teka itepa raratep aser idangji ajungbena dang sepaitemi injang khaloktsü dang nisung ishika khaset aser kar yirutsü. Iba jagi yimdaklirtem jena aotsü merang.

Sepaitemi yimdaklir indang bike auya aser injang khaloktsüba manen. Ozü lanurtem tepsetaka onoki parnok timi odaktsütsü mela saka injang khalokja nisung tepsetba manen. Yimdaklir kar machine ka tsüingdang atsük saka parnokja khaset, ta Oting nungeri metetdaksü.

"Indian Armed Forces-i Longkhao/Yatong, Oting Village nung tai maketba civilian aser lanurtem dak lapi mapa inyakba khukhua aitsür. Tang nungi Oting nungeri Oting telongtet (Lower Tiru dena) nung telungpur telok balala aser Indian armed forces shinga arutsü memelar" ta parnoki metetdaksüogo.

Iba tetuyuba sülen manidakerem dak langka kar dang atalokra Oting nungeri iba tebilemstü khuret mabentsü, ta Oting Citizens indang Office-i ashi.

Külen, Parliament nung MP temi iba tatalokba indang osang tiyazü aser yanglushir jembir ta Oting nungeri ashi.

Union Home Minister-i osang tai metetdaksü: K Therie

Dimapur, December 8, 2021 (TYO): Parliament nung Union Home Minister Amit Shah-i maitsü aibelenba ajanga nisung 14 khaset ta nangzükogo saka paisa ochi miembangtsü atema pickup truck gari maneba agi injang khaloktsü ta ashi. Iba ya linük nung nübortem mashileni anitsü merangba inyakyim ka lir ta NPCC President, K Therie-i ashi.

Sepaitemi maitsü aibelenba khaset süra Amit Shah-i shirnok lendanga ataba'er osang ashitsüla, kechiyong Naga telungpur telok ajaki India sorkar den Ceasefire nung sign sütepa lir ta pai ashi.

"Tanabuba nung nisung 8 mena aliba pickup truck gari anentsü shiaka jena aotsü merang ta tai tongloktsür. Ajisüaka iba lendong nungi jenbur katibo sepaitemi gari anentsü kecha meshii dang injang khaloktsü ta

ashir. Talisa, lanurtem amakba lenmangji kanga majung aser gari karakara aotsüsa masü" ta K Therie-i metetdaksü.

Jorhat nung amenoka aliba 21 Para (SF) ajanga Tiru valley nung lanurtem khaset ta tai tonglokja lir. Law & Order ya state onük ka lir anungji Nagaland Chief Minister aser Home Minister dang intelligence report ashiba sülen ang inyaksüla. Anungji shibai 21 Para (SF) nem iba mapa inyaksü temelaba agütsü'ar yimjak nung metetdaksütsüla ta paisa ashi.

Lanurtem tepsetba tatalokba miembangtsü meranger anungji aibelenertem tangsa aputsüla, ta Therie-i takhangba agütsü.

India sorkari 1958 küm Armed Forces Special Powers Act (AFSPA) latet aser mapang shia atsülanga arur. Iba Act ya state sorkari khen danga

mebenokdang lir. Ceasefire masü dang nisung meyirjang aika taküm samaogo aser politician aika taküm agiba den aika agitsü merangogo, ta pai metetdaksü.


Onoki India sorkar dang AFSPA agientsü ashidang iba ya nübortem kümzükua ayutsü aser tensa süngjema ayutsü atema lir ta ashi. Ceasefire sülen-ia N. Rio-i aniba regional political party-i küm 18 tashi yimsü süa arudang iba atema süoki ia mebilem, ajisüaka tang nisung taküm 14 laluba sülen ang pai AFSPA 1958 agientsü takhangba agütsüogo, ta K Therie-isa ashi.

Tang telok ajak Ceasefire Agreement kübok lir aser olemtep tembangogo anungji AFSPA 1958 ayutsü nungdak madoker. AFSPA 1958 alitsü temeten kecha mali anungji onoki tangsa agientsü akhanger, ta paisa shisem.

INVITATION

In Memorium

A TRIBUTE PROGRAMME



9TH DECEMBER 2021 | 3.00 PM

VENUE : CAPITAL CULTURAL HALL, KOHIMA



The CEO, Kohima Smart City Development Limited cordially invites the Honourable Legislators, Nagaland, AHODs/HODs, Pastors & Leaders of Churches in Kohima, All Tribal Apex Bodies of Nagaland, and well wishers to a Programme 'In Memorium' a Tribute in solidarity to our Naga brethrens of Oting Village to be held on 9th December 2021, 3:00 P.M at the Capital Cultural Hall, Kohima.

Your presence will be highly solicited.


Sd/-

Er.K.THEUNUO

Chief Executive Officer

Kohima Smart City Development Limited
Kohima, Nagaland.

Naga Hoho lenirtemi Oting yimtsüing semdang



Dimapur, Luchii/Dec. 08 (TYO): 21 Para Commandos temi nisung tepsetba osang tsüing tong oa metettsü aser mangyim tejashi lemsateptsü mechi tir HK Zhimoni-i anir Naga Hoho ketdangsürtemi November 7, 2021 nü Mon district kübok Oting yimtsüing semdanga liasü.

Iba lendong atalokba tenük kuli alirtemi Naga Hoho dang iba lendong ya aibelena ajitetba ka masü saka asaa inyakba ka lir aser iba kuli ji Indian Security Forces aser parnok tanishirtemi tajungba meteta alitsü, ta ashi.

Parnoki ashiba agi, yimdaklir ya Naga Nagtional Political Groups mesüra Indian Security Forces den tesendaktep kecha mali.

Lendong ajurur alirtem ya

ayangi aoba kidangi meyipa shilangba mapang Security Forces temi atsüka atar civilian dak injang khaloktsü aser parnok tai maket nüburtem lir ta ayimtenaka manen, ta tentik kuli alirtemi ashi.

December 4, 2021 nü Security Forces temi metetsümonga injang khalokja ayanger trok yangji takum samatsü.

Prangbong ola angashiba sülen yimdaklirtem kechi atalokar metettsü atema iba tesem yagi arüsaanga ao. Ajisüaka Security Forces temi tasü mang tem ya Jawan tem indang uniform agi aleper miimsü meranga tepseter alirtem ya Naga National Political Group nungi lir ta bilemdaktsütsü merang.

Yimdaklirtemi par nisungtem jangjateta tejashi nung Jawan tem

den raratepba mapang ano maneni Jawan temi taochi mesayui nüburtem dak injang khalokja yangjia ano nisung tenet tepset aser aika yirutsü.

Union Home Minister-i parliament nung osang tiaziü agüja aibelena ajitetba ajanga iba lendong ya atalok aser pei takum kumzüktsü mechi mera agiba ka lir ta ashiba atema yimdaklir temi aitsü, koba agi timtem ajurua aliba kinungertem aser Oting nüburtem molung tali yirutsü aser ibai zübu nung metsü inokba amai lir, ta parnoki Naga Hoho lenirtem dang ashi.

Union Home Minister-i yimjak nung tatok meshitsüla, mesüra tai maket nüburtem tepsetba ajunga pa kolak nung abentsüla, ta nüburtemi takangba agütsü.

NSCN/GPRN-R (Akato) ajanga Terhunyi salem lemsatep

Dimapur, Luchii/Dec. 08 (TYO): NSCN/GPRN-R (Akato) ajanga sangdong ka nung Angami Naga nunger den Terhunyi benjong salem lemsatepa liasü.

Angami Naga nungeri benjong (nyi) aika amunger aser item rongnung 'Terhunyi'

ya ka lir, koba December 9 nung ajurur. Iba benjong ya temang anema yutsüba aser alu junga aruba atema Tsüngrem nem tenüngsang agütsüba ka lir.

Asen Angami nunger adianu aser adianutsürem Terhunyi benjong amungba mapang ka

ama bilemba tanüla, tanaben lungjemshiba, tatok agütsüba, taremsüktep, tesunep tanüla lidakjangma.

Parnok nem tajungsang Tsüngremi maneni Pa temeim, taochi aser temoatsü mulamushia agüjangma, ta sangdong ajangasa ashi.

Impur Christian Hospital nung ANM azünger pela agizükba sentong agi



Impur, Luchii/Dec. 08 (TYO): Impur Christian Hospital (ICH) nung Auxiliary Nursing Midwife (ANM) student tem pela agizükba sentong ka December 8, 2021 nü agia liasü, ta sangdong ka ajanga ashi. Naga lima tesem balala nungi ANM atema nisung 20 arua tenüng züluokogo.

ICH ya 1912 küm lapok aser tanü tashi nung aika asoshi shi aser tanela nung taneptsü angudak mozüki ka süa arutagi. Tsüngrem tenüng asanger. Tang koba ANM course agütsütettsüsa sorkar nungi temelaba nguteta tenzüker, iba ya hospital asoshi alizüing tulu ka atongba lir, ta sangdong ajanga ashi.

Maneni rangben taneptsü asoshi iba mozüki asütsü nükla tulu lir.

Iba sentong nung Dr.

Sahimeren Aier, Chairman, Board of Trustee, ICH ajanga tenüngsang ajak Tsüngrem nem agütsü aser talisa medical nung tongti süa inyaker dang ICH asoshi aria bilema maongka tulu agütsüba asoshi pelaba shisem.

Rev. L. Yapang, Secretary, ABAM Church & Mission ajanga Ibrü 12:1 nungi tenyar Paul-i sayuba asemteper asoshi yimya asem atishia kaketshir dang tanü nungi nenoki alizüing atongtsü asemtepdang, khuret ajak tesülen tokjang, taremsük liang, aser Yisu dak rangloker asemtepdang, aji süra asangsang nung nenoki nenok tebilemba atongtsü, ta tayongzükba tulu agüja liasü.

Rev. Dr. Mar Pongener, Executive Secretary, ABAM ajanga ICH Board of Trustee dang kanga pelar ta shia ano talisa Dr. Sashimeren Aier aser Rev. Bendangmeren dang pei

mapa ama bilema tepelem jenti aremszüka iba mapa asangsang nung bener aruba asoshi pelaba lemsatep.

Pai arogotem aser kija kibongtemi mokoroi tenlaba ajanga ICH takok ngua aor asünung parnok dang pelaba den tarutsü anogotem nung maneni nungita yaritsü shia liasü.

Paisa kaketshirtem dang, nenoki shimtetba mapa ya meimchir asoshi nungdaka aliba mapa ka lir, anungji nenok taküm rangbenji aika asoshi taneptsü abenba taküm kaka asütsü tamang yur liang, ta ayongzük.

COVID-19 Nagaland: Ka dak putet, taneptsü angur 3 liasü

Kohima, Luchii/Dec. 08 (TYO): Bodhbarnü Nagaland nung nisung ka dak COVID-19 tashidak putet aser taneptsü angur asem liasü, anungji state nung iba tashidak agi meneper ajak senteper nisung 32,143 alitsü.

Nisung ka dak iba tashidak putetba ya Kohima district nung aser taneptsü angur ya Dimapur nung alitsü, ta State Nodal Officer for Integrated Disease Surveillance Project, Dr Nyanthung Kikon ajanga anogoshi sangdongba COVID-19 bulletin nung ashi.

Taneptsü angur ya nisung 30,262 alitsü aser taneptsü anguba rate ya shilem 94.15 alitsü.

State nung tang active cases 116 lir aser item rongnung iba tashidak agi timtem sümia agütsüba nisung 17 lir, kanga mejungi kangshir nisung pezü aser timtem kecha mali nisung 97 alitsü, ta pai ashi.

Asemnü buba asü-ama mali aser tang state nung iba tashidak agi asür nisung 699 alitsü aser item rongnung nisung 16 dak danga tashidak liasü, ta pai ashi.

COVID-19 agi menepa alir

nisung 1,066 danga state temi ogo, ta pai ashi.

Tang tashinung COVID-19 tashidak alitsü temolung melemteti Nagaland nung sample 4,14,390 tendanga lir. Item ya RT-PCR nung 111,620, TrueNat nung 88,982 aser Rapid Antigen nung 2,13,788 alitsü, ta Dr Kikon-i ashi.

Mongulbarnü tashinung Nagaland nung nisung 747,592 nem COVID-19 vaccine doses 13,05,256 agütsüogo, ta State Immunization Officer, Dr Ritu Thurr-i metetdaksü.

State nung vaccine agir alirtem ya frontline nung inyaker nisung 60,982, healthcare nung inyaker nisung 15,999, arishi küm 45 nungi tema nisung 211,278 aser arishi küm 18 nungi 44 tsüingta nisung 459,333 alitsü, ta pai ashi.

Nisung 557,664 nem vaccine dose tanabuba agüja parnok iba vaccination course tembangogo. Parnok ya frontline nung inyaker nisung 48,556, healthcare nung inyaker nisung 13,525, arishi küm 45 nungi tema nisung 174,957 aser arishi küm 18 nungi 44 tsüingta nisung 320,626 alitsü, ta Dr Thurr-isa ashi.

Y. Patton-i Oting lendong nung yirur alirtem semdang

Dimapur, Luchii/Dec. 08 (TYO): Oting nung December 5, 2021 nü lendong atalokba nung yirur alir par trok den Nagaland Deputy Chief Minister Y. Patton-i December 8, 2021 nü tsüing tong oa ajurua liasü, shirnok CISHR Referral Hospital aser Faith Hospital Dimapur nung anepaluba mapang lir.

Patton-i yirur alir aser kinungertem temolung süngzükja aser ajungmeso aser senotsü teyari agüja liasü.

"Nenok tai masü sernung nenok kanga tim atemer aser okronger, aser ibaji ajanga kü molung shiranger," ta Patton-i yirur alirtem dang ashi.

Parnok rongnung CISHR nung anepalurtem ya arishi küm 35 tain Phojem Konyak, tepiret achichilen jaksar ICU nung lir, arishi küm 31 tain M. Tingte tapubang, teperem aser teku telung nung yinsang aika jangoka Private ward nung lir,

arishi küm 29 tain Atem dak tesülen nungi injang khaloktsü aser doctor temi injang ka agizükogo, ta ashir.

Pa dak ano injang kar tongtoret telung nung lir, aser aji agizükra tali timtem ajurutsü, ta doctor temi ashir.

Arishi küm 47 tain Manglei ya Private ward nung tepi abelen yirur lir aser pa temang tajungba lir, ta ashir.

11 IR nungi arishi küm 38 tain Baujoi Phom ya teka achichilen yiru aser pa temang tajungba lir, ta ashir.

Arishi küm 41 tain Temjun Konyak ya Faith Hospital nung lir aser pa telongpu yirur lir. Pa telongpu nung 'foreign bodies' ana lir aser CD scan agia tabu balala tendangba sülen surgery agitsü, ta doctor temi ashi.

Deputy Chief Minister ya meina Commissioner Police Dimapur Rothihu Tetseo IPS den police tanishirtem, EAC Chumukedima, putu menden aser dangartem oa liasü.

General Rawat, pa kinungtsü... (TAPAK 1 NUNGI...)

"Tanü lendong nung asür Gen Rawat aser tanga armed force personnel temi India kanga nendaka tenzüokogo" ta Prime Minister Narendra Modi-i metetdaksü.

"Tamil Nadu nung helicopter tsükokdang Gen Bipin Rawat, pa kinungtsü aser Armed Forces personnel süogo. Tasür kibongtem den mangyimer" ta PM Modi-i ashi.

General Rawat ya Wellington nung aliba Defence Services

Staff College (DSSC) nung o jembitsü atema aoerba liasü.

Helicopter ji Sular airbase nungi DSSC, Wellington-i aodang tsükok. Iba lendong bushisüngdangtsü tuyuogo, ta IAF-i metetdaksü.

December 31, 2019 nü Gen Rawat-i India nung mezüngbuba Chief of Defence Staff inyakttsü tenzüok.

India mitkar putiotsü nung pa ya mapang talangtiba mapa inyakba four-star general liasü.

Congress MP tem Mon-i meyokba... (TAPAK 1 NUNGI...)

Iba tatalokba indang osang ya Gaurav Gogoi-i metetdaksü aser MP temi Jorhat airport kima nung lungkak aitiba noksatem lemsatep.

Jorhat nung Congress teshimtet telok ozüing alema pua ayuba anema lungkak aiter. Nagaland nung Mon district nung tasür kibongtem den ajuruteptsü atema noktanger" ta Congress MP Gogoi-i ashi.

Congress MP pezü ya Bodhbarnü Delhi nungi apuso aser parnoki Kolkata aser Jorhat adena Mon nung oa tasür

kibongtem den ajuruteptsüba sentong liasü, saka district magistrate-i parnok meyoktsü tetuyuba agütsü.

"Mon aser arrtsülen aliba district tem nung Law & Order tensa aliba ajanga Assam tsütsü nungi civilian aser tangartem Mon district leni meyoktsü atema Nagaland sorkari tenokdangba agüja lir" ta Jorhat District Magistrate-i ashi.

Nagaland sorkari temelaba agütsüra parnok yoktsü ta paisa shisem.

Welcome to My Handloom My Pride

STATE HANDLOOM EXPO

w.e.f. 7th TO 20th DECEMBER 2021

At URBAN HAAT, DIMAPUR, NAGALAND.

TIME : 10 AM to 5PM

ORGANISED BY:
NAGALAND HANDLOOM & HANDICRAFTS
DEVELOPMENT CORPORATION LTD.
DIMAPUR, NAGALAND.



SPONSORED BY:
Office of The
DEVELOPMENT COMMISSIONER (HANDLOOMS).
MINISTRY OF TEXTILES., GOVT. OF INDIA, NEW DELHI.

GOVERNMENT OF NAGALAND DIRECTORATE OF TECHNICAL EDUCATION NAGALAND: KOHIMA

NO. DTE/ SCHO-10/2019/

Dt. Kohima, the 8th Dec 2021.

NOTIFICATION

In continuation to this office Notification of even No. dated 12th Oct 2021, it is hereby to inform all the students belonging to the Indigenous and Schedule Tribes of Nagaland that the invitation of online application for State Technical Scholarship Scheme has been extended till 31st January, 2022.

Students who have not registered or applied for the said scholarship scheme can apply from the common Scholarship portal www.scholarship.nagaland.gov.in

(Er. M. NAKRO)

Addl. Director & HOD.

Issued by DIPR

Manipur nung Oting mesükba lendong ataloktsü: MLA Leishiyo Keishing

Imphal, December 8, 2021 (Agencies): Manipur kübok Kamjong aser Ukhrul nung 42 Assam Rifles-i 'Aggressive Defensive Posture' agütsüba ajanga Nagaland kübok Oting nung lendong atalokba ama ataloktsü ana nung lir, ta Manipur nung Naga People's Front MLA, Leishiyo Keishing-i ashi.

Oting lendong nung sepaitemi civilian 13 tepset.

Leishiyo ya Kamjong district kübok Phungyar constituency (ST) nungi MLA lir aser taoba advisor to chief minister N Biren Singh inyakogo.

Armed Forces Special Power Act (AFSPA) tashi ajanga sepaitemi tai maketba civilian tem dak tashiyim inyaker, ta pai ashi.

AFSPA ajanga reshikangshir, tetsür dak tashiyim inyaker aser tepseter: Agatha Sangma

Shillong, December 8, 2021 (Agencies): Nagaland kübok Mon district nung azütokshiba sülen Meghalaya Lok Sabha MP Agatha Sangma-i Armed Forces Special Powers Act (AFSPA) aitsüba den agientsü takhangba agütsüogö.

"Armed Forces Special Powers Act (AFSPA) kübok tai maketba civilian tem kangshibaji tang mezüing masü" ta Agatha-i Speaker dang ashi.

Iba Act dak tashiyim ulura lir

Tawa Kamjong aser Ukhrul District tem nung 42 Assam Rifles-i "AGGRESSIVE DEFENSIVE POSTURE" sangdong agütsüba ajanga Manipur nung Oting nung lendong atalokba ama ajurutsü ana nung lir, kechiyog idakia AFSPA lir, ta Leishiyo Keishing-i metetdaksü.

Anungji AFSPA agientsü atema ni takhangba agütsür aser "AGGRESSIVE DEFENSIVE POSTURE" tetuyubatem ajanga Northeast nung kanga dang meranga tensa süngjemdaksüba aser yimjung bener aruba raksatsütsü, ta pai ashi.

"December 4, 2021 nü Mon District, Nagaland kübok Oting yim nung sepaitemi tai maketba civilian 15 tepsetba atema ni

asere Jeevan Reddy committee-ia iba Act agientsü shidangogo, ta lai ashi.

"Northeast nung telungpur maparen anendaksütsü atema 1958 küm AFSPA yanglu, saka ibaji meinyakteter. AFSPA ajanga civilian reshikangshir, tashiyim agi shi nung medemer aser tepseter" ta Agatha-i metetdaksü.

2000 küm 'Malom Massacre' nung nisung 10 asü aser iba jagi Iron Sharmila-i lumia lungkak aittsü tenzüka ta laisa ashi.

temolung raksar aser mangyimer" ta paisa metetdaksü.

"Iba ama mapa tamajung inyakba atema aoksar aser mepelar aser khukhua aitsür. Tesüba mapanga iba amai atalokogo aser public temolung sadoka meliteter" ta NPF MLA Leishiyo Keishing-isa ashi.

Külen, Manipur nung Civil Society Coalition on Human Rights (CSCHR)-ia Manipur Chief Minister N Biren Singh den yaritepa Centre dang Northeast nungi Armed Forces (Special Powers) Act (AFSPA) agientsü takhangba agütsütsü ayongzükgö.

Sepaitemi nakmati aturtem aser lungkak aiter nisung 14 tepsetba den aika yirutsüba aitsür, ta CSCHR-i metetdaksüogö.

Nagaland kübok Mon district nung Honibarnü Oting aser Tiru yimtem tsüngda civilian 13 aser sepaitemi ka tepset, ta Superintendent of Police Imnalensa-i metetdaksüogö.

Oting nungi anogoshi aayanger telok ka nakmati atudak nungi pick-up van ka nung mener arudang sepaitemi injang khaloktsü.

Iba tatalokba anema Mon district nung lungkak aitdang ano sepaitemi civilian ka khaset.

JD (U)-i Dec 18 nü Imphal nung sentong tulu ka agitsü

Guwahati, December 8, 2021 (Agencies): 2022 Manipur Assembly elections nung tenük yoka Nitish Kumar-i aniba JD (U) ajanga December 18 nü Imphal nung sentong tulu ka ayongtsü sentong renemogö.

JD (U) national president tasen Rajiv Ranjan Singh (Lalan Singh) lenisüba kübok Manipur aser northeast nung tanga state tem nung party asentenshitsü meranger.

"Lalan Singh lenisüba kübok JD (U) ajanga East Imphal district

nung December 18 nü sentong tulu ka ayongzüksü. 2022 assembly election matongdang Manipur state nung party aliba metetdaksütsü atema iba sentong agitsü" ta JD(U) Manipur state president Hangkhanpao Taithul-i ashi.

Manipur nung taküm aluruba menur aser ibaji December 15 tashi nung tembangtsü imlar. Ano Christmas benjung mongpu amongtsü lia iba sentong nung nisung aika adentsü imlar, ta pai ashi.

Lalan Singh aser tanga JD(U)

national leaders December 17 nü Imphal atongtsü ta Taithul-isa metetdaksü.

Tang Northeast nung JD(U) indang MLA ka dang lir aser ibaji Arunachal Pradesh nung lir.

Arunachal Pradesh nung 2019 assembly elections mapang JD(U)-i menden 15 nung toktepa nungi 7 nung takok ngua BJP sülen second-largest party aküm.

Ajisüaka, JD (U) MLA 6-i December 2020 nung BJP nung aden aser iba jagi MLA ka dang anünga lir.

LANGPANGKONG SENSO TELONGJEM, KOHIMA KÜM 50 BENJONGMONG SENTONG



OMEN: "Nükla Tasen"

Anogo : 11th December 2021

Mapang : 1.00 pm

Tesentepdak : "Molu Kl", Kohima

ESTD. 1971

TELONGJEM AJANGA TARENLOK

TONGTI TEJAKKER:

Wb. Tongpang Ozüküm

Minister,

NPWD (Housing & Mechanical)

SENTONG TARENSEN

Sentong Lenir : LSTK Ketdangpurtem

Kü Langpangkong : Tanir- Timsür

- Jubilee monger pela agizükba : Tir, LSTK
- Lai züngarasademtsü : Rev. A. Chuba Jamir
Pastor, KABA
- Asürtem bilemtetbamapang : Wb. I. Meyionen,
Chief Information Commissioner
Nagaland Information
Commission
- Jubilee salem O
 - Wb. Mars anen Imsong, Tir
Langpangkong Tzükgong
Mungdang
 - Wb. Chubalepzükg Jamir,
Tir, Kohima Aoer Telongjem
- Ken : Kongro Lanurenla, Kohima
- Tajungshi O : Wb. P. Talitemjen, IAS
Chief Secretary (Rtd) Kimen, LSTK
- Tetushi tejaoker O : 1. Wb. Imnatiba, Hon'ble Advisor
2. Wb. Amenba Yaden, Hon'ble MLA
- Nüngo Kaket sayatsü aser
tayongzükgba O : Tongti tejaoker:
Wb. Tongpang Ozüküm
Hon'ble Minister
- Tongti O : "Nükla Tasen"
Tejembir : Wb. Mayang Lima,
Upa Lokayukta, Nagaland
- Küm 50 Benjongmong
Pangzüng : Luden Tayonger
- Melepzüng O : Wb. T. Meren Paul,
Transport Commissioner Rtd.
- Tatem sarasadem : Wb. O. Sashi Ozüküm,
Pastor, KABA

TEMETETSÜ O

- Iba sentong nung anük-apang ajak arua atentsü pelashishia jaoker.
- Iba benjongmong ya Governmenti lateta aliba Covid-19 SOP ajaki amshia anidaktsü.
- Iba sentong takok aser temoatsü ngua tembangtsü asoshi ajaki sarasadema atadi ta ayongzüker.



TIR YIMYIM YIMOBILEM (EDITORIAL)

DIMAPUR YANGTEPNÜ, LUCII (DECEMBER) 09, 2021

Tangariang tajungba jembitsür

Tanü putu nung nübertemi mulungba nung yimsüsüba yimtenren nung, tagitsü tongtibang kaji, kima yimdong nung nübertemi kechi jembir ta asüba agir masü saka tatar senden nung nübertemi shimtetba yimten yimsüsürtemi kechi koma ashir ta asüba nung telemtetba agir. Ibayongjiang, nübo, mapang aser rongsen jenti endoka küm pungo shia election agir. Aji oda, nübertemi shimtetba tetezü, shiba shimtetdir shimtetang, pa mesüra laji tatar senden nung nübertem tenüng nung nübertem asoshi jembitsü atema pi rongi yoker. Ibayongji, nübertem meimba aser parnok tia meteta aliba o jembitetter, nisung tetemsü, shimtetter yoker. Item jagi par nübertem tia aser parnoki ajuruba tensa tia tajung-tamajung ajak indang tatar senden nung pi mulung koka jembir. Tanü asen lima nunga Oting nung India sepaitemi yimtaklirtem hopta junga mijang atudak ayanga monger, Honibar nikongdang anü lia kinunger ajurutsü yongyaseta kidangi meyipa shilangba mapang, kenyongi taochi maka injang yoka khasetba lendong atalokba indang, India tatar hoho Lok sabha aser Rajya sabha nung ken o sashia benoka jembir. Iba lendong atalokba osang angashia, asenoki mashidangyongi tanga state nungi tanga yimten telok nungi tatartemi Nagaland nung tai maketba yimtaklirtem sepaitemi khasetba indangji, tanga onüktem jembitsü renema alibatemi toktsür, aji tama jembimatsüla ta mapang meshir jembir tenzükbaji asenok asoshi teyari tuluka asütsü. Aji oda, tangari asen dak meimlaba lendong tulu atalokbaji parnok dak atalok ama jashia tatar senden nung jembiba jagi asenoka ajungshir aser tasü aiter. Atangji, asenoki shimtetter yokba tatar asen nisunga mena lir, saka asen nisungi jembiba dang nungibo noklangben agia tangari asen atema tajungba aser süoki taiba ia jembitsür. Atangji, yimten telok balala nungi tatar aikati Naga nung tai maketba nisungtem sepaitemi kasetbajia sashia aija jembigo aser tejashi sayua tatar senden nunga maden oadokba tashi atalokogo. Item ajak dakji alaka, ano, All India Majlis-e Ittehadul Muslimeen (AIMIM) tatar Asaduddin Owaisi, Congress tatar Assamese nung Pradyut Bordoloi aser Gaurav Gogoi, National People's Party tatar Garotsür Agatha Sangma nungertemi Oting nung atalokba lendong indang asenok dang nungibo tajungba aser tesashiba jembitsüba atema asenoki parnok akhümtsübudi. Parnok rongnunga, talisa asen kidanger Assamese nung aser Garo nung aser Garotsürtemiang asenok asoshi aria tebilemba bilema jembitsüba jagi Nagaland nungi Lok sabha aser Rajya sabha nung tatar kaka dak nungibo teimba ali ama alimai meteta Naga nungertem dak atalokba lendong timtem indang jembigo. Parnoki asenok asoshi sashisashia kanga junga jembitsübaji ngur, jangratema bilemer aser parnokjiang Nagaland nungi asenoki shimer yokba tatartemang sünüali ta nükshia bilemer. Aji oda, tatar senden nung ken o jembibaren nung parnok o asenok na kodang medemdangdir, asenokbo tenüng agi oa amener ama aser tenüng agi dang nokdaka sayur ama senden nung mendenbubaia bilemtsüsa asenokia angur. Tanü asungbo tajung kaji, tatar senden tagidak nung jembiba aser atalokba ajak television nung yoker, anungji nübertemia pei vote agi pei lima aser nübertem atema jembitsü shimer yokba tatarsangi kechi komaka shilem agiar angur. Odanga asenokbo state tala, anungji tangar state-tem den medemdang dangbo, nütsüng agi tatar ka yoktsübajia malang saka ka dang nungi tajembabo meyoktetba agi kaka yoker. Iba jenjangji meteta, asenokbo shiba yokdir yokaka, tsüraburi jembia arua ama, ka agi ter shia asütsüsa yoktsüla. Asenoki election agiba ya kanga zübaa bilemer, iba jagi kari vote ayoker aser aikati vote agütsüi maor. Aji oda, election nung toktepertem ya nübertem tenüng nung sen agizüka achitsü asoshi sen lu ayimtsü meranger amai asenoki bilemer. Ibayongji, election temerbo majurutettsüji aser teyaria kecha memeshitsüji, election nung meshizükba sen ya dang asütsü ta bilema vote ayoker. Aji oda, vote melen sen dang ngura ojang ta ser tembang nem asüyonga korang semtsütsü ta jembir. Ajisüaka, tang ama asen lima nung benjonga mememongtet, yimkong mangyima amongtsüsa atalokdang, tembang jagi tatar senden nung asenok asoshi kechi jembitsü ? Tatar senden nung asenoki tensa tiaji tembang jagi meshitetra, asenok kong jenoktsü ? Asenok tejashi aser taginüba shibai shitsütsü ? Tangbo tia ajung, Assamese nungbai aser Garotsürlai asenok atema jembitsür, saka aji agi meperir. Ruling nung mesüra opposition nung ta mali, asenokia asen nungdakbo, tangar amaji, raa shitetsüsa asenok ajaki yimten nung shilem agitsüla.

OLEMSABANG

Yisu Khrista Asoba Bilemteta Tepela Benjong Sangdonger

~ R. Imkong Lkr, Mangimen

Taküma yisu khrista asoba tepela benjong mongpu tu arudarji nisungtemi kanga yongyaseta atatepdagi, iba benjong ya asenok meimchirtemi tangatetba tapu ana nung amonger. Mezünpuba nung alimar she azü tejangraba nung khristmas benong ya mongteper ta reprangteter. Tatishitsü agi tantsür asaer tambourtem rongnunga karibo benong tulu ayongzüka rongsen jenti lalua konang nungasang aser tetushi tulu angutsü atema imlaa amonger, aser ano lanurtem rongnunga aikati she azü jangraba nung lalushiponga amongtsü atateper. Aji oda aikati yi jema, she ango den jangratema chia jemtepa pei pei tetongteji den ajurutepa amongtsü yongyateper, aser ano tanü asung balaka sensaker aser takar chirtem ta mali Aier aser Asangurtem timba ka ket nung mobile tajung sen aika alangbatem tu tesabok nung melepa bener iba jagi japujaria tamagitsü noksatem dangoka asayateper aser jembiteper, iba jagi asen teyanglur Tsüngrem mulung chidi ma? Mekümdangra temoatsü angutsü melena atakatemang bener arutsü ana nung lir ta tamborutem rongnung karibo laishiba o taroktem aser tanü alimar temetetba shsiatsü nung karaa ainba indang angazüknüa tashi temetetertem aika ki sema jajaa senzür, kechiba ta süra, tenla kidangbo item amala ajakjibo mangazükteter, idangji karibo tambourtemi asungdangbatemji tatongi rasaa rateta ashir, aji oda parnok tajangzük tulu angur. Saka tashitemetetertem rongnung karibo asungdangbatemji langzüksü melena plain paper ka bener aruagi pencil mesüra fountain pen ka agi press man mesüra press woman ka mesüka zulutena ayur, aser ashir, ni kar den asungdangteper telangzübaji agütsüdi asung mesüra yanüang arudangangma ta ashir. Idangjibo onok amala tambourtem tu monga asungdangya senzütsü masüji pei-i angazüknüa tejangrabtem tu yangji anenadoker.

Tanapuba nung khristmas yongyaba aser ajurunüba indang tatsüka lemsatepner, kodang yisu khrista asoba anogo benjong tu donga arudir, onok amala sensaker küt nung kecha rongsen ali masüji temeimeritemi shejip tilala agütsüba tu tsükden nung kongdaka ayur, aser asung 25 December anogo yisu asoba mapang tu donga arudang aonung tu she takong tilaka wadaka akaba tu agizüka tilala küma alangsar, aser aounbo nung tu enoka metsü mersü teperi enoker aser yangji itzü tasen tu aika shioka jungjunga rosepa sua yur mejangadoker. Aser anepdang yakta an tepongi khristmas osang sangokja temenungratsüka akongba angashir, aser azüsangnutemi süngdong kongsangtem nung menner anüsangwa yaloktsüba den külemi temenungratsüka ola balala agi Tsüngrem tenüng asangba angashir. Idangji tambourtem aser tantsürtemi pei yipden nungi saker aser taküm tajung nung lia arishi moatsüba atema Tsüngrem nem tenüngsang agüja sarasademer kelen tejak tebang shidoker süngo mulua ajemer. Iba sülen tu aritepa chi tongdaka sürrur kelen, yasung she takong nangnanga sua yua akaba den tu pelaseta jangratema asentzua alua chiyungteper, yamaji pei kibong sasep nung pelatepa chiyungtepa dangji tepela khristmas ta ajar. Iba sülen tu benjong mapang nung sübütsü ta ser süoshi tejen asüyonga merük merüka shidoker yua akba tu sübur, aser tepela tenla sen 10 bener oagi sentep mapang tenla agütsür. Aser Khristmas sentep mapang nung tenla kidang nüburtem ajaki tepur kanga junga sübua renemteper mentepa alitang Pastorbaba mesüra Pastornila mersüra sayutsüngir tajung kati kümtetdakba yisu khristai asen meimchirtem menen nungi kümzüksü alimai aruba osang tajung indang sangoktsür. Aser ano C.Y.E purtemi yisu kinu tanur asoba indang tu drama tajung ka ia sayur, aser telok ajaki khristmas tepela ken atener. Koda jangratemtsü tepela khristmas nübertemi amonger.

CHRISTMAS

Talubosa taküm akatsü asoshi ni aruogo (Yohan 10.10)

~ Dr. O. Shiluina Jamir

(Yashi adok nungi...)

Yisu Khrista alimai arubaji asen kija atema dang masü, saka meimchir ajak taküm alitsü aser atangji talubosa lidaktsütsü asoshi aru. Shirnoksa Christmas mapang "süoshi tasen" second hand token nungi alir asemtsü, shirnoksa tangar temeimeri lemsatepa ajanga Christmas mapang jangratema tepok sünga chiyungtsü, shirnoksa shirang yimden nung Tsüngrem O aser Christmas caroltem angatsü, arung asenoki sannükertemi ama tanela nung Bethlehem bushi odi. Mapang ajak nung Immanuel - Tsüngrem asen den, mangyim mapang aser temoatsü mapang, takok aser tamakok mapang ajak nung asen den Tsüngrem dena lir ta iba Christmas mapang asenoki sangdongdi. Asenok amozüka moli, saka saksalema aramesoa sannükertem ama Tsüngrem bushia odi kechisaer Yisu Khristai asenok nem tanela aser shi nung nüchiso agütsütsü. Aji dang masü, Tsüngremi meimchir talenba nungi salatsüba osangtajungji sannükertem ama alima ajak nung sangdongdi.

Taküm Christmas nungi tenzüka, Yisui taküm talubo/jenti agütsür (abundant life) ta asübaji pei agitsü aser pei ajungtsü atema dang masü saka meimchir ajak taküm talubu angutsü agütsü ta angatetdi. Iba temaitsü mapa nung asenoki asen akaba nungi lemsatepdi. Ibaji Tsüngremi aginüba aser ochi inyakbaji lir. Yisu sülen jajaba mezünpuba meraji aji alitsü. Asen arogo aser kiyong nung makamaitertem aser shirangertem mesüra tasüba ajurua alirtem, mesüra kija rongjena alirtem bushia oa asen mapang, rongsen aser sempettem parnok den lemsatepdi. Asüküm nung masü saka tala kümer (in humility) asen yimtak kinük nung alir amitsürtem aser tantsür-tamburtem ki sema odi. Yisu alima nung alidang pai takar den mejaja. Saka makamaiter, aser shirnager aser mokokmeineritem den mapang teimba entok. Yisu Khrista taküm aser mapaji asenoki ajizüka (imitate) inyakdi. Tajung Samaria nungba amato asenoki asen kidang alir teyariteper tanurtemji azüiter temeim nung amshidi. Küm shia aikati Christmas cake aser doughnut Minister, MLA aser Director-tem kidangi bener yoker. Saka takümba asenoki item sempettem ya sensaker kibongtem dangi tama yokdi.

Tatem nung, aser kanga tongtibangsa, taküm Christmas nungi tenzüka asenoki taküm talubo/jenti angutsü (life abundant) ta asübaji Tsüngrem metetba, Yisu sülen jajaba, aser Tanela Temshi agi leniba taküm koba ajanga asenoki ochi aser tiyazü, shitak aser tia bendangteter iba takümüji ta angatetdi. Practical taküm nung iba tetezüji temeim aser taochi nung asen kiyonger and tangartem den anogo shi alibaji lir. Iba ama aliba ajanga asenoki Christmas mapang tang masü saka anogo shi taküm nung chichiba Yisu Khristai atangji talubo aser tetemjen taküm kechi bener arutsü iba temoatsüji agidi.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazüngerü angateta agitsü mepishir**

Madhya Pradesh nung lokti kati missionary school ka raksatsü



Hombarnü (December 6) Madhya Pradesh nung Vidisha district kübok Ganj Basoda jila nung Bajrang Dal nungi züngsemtemi raksatsüba Khristan school noksa nung angur.

Bhopal/New Delhi, Luchii/ December 08 (Agencies): Hombarnü (December 6) Madhya Pradesh nung Vidisha district kübok Ganj Basoda jila nung Khristan school ka nung class 12 purtem CBSE Board tatidang tagidak mapang nung Hindu yimsü alia amanger telok-Bajrang Dal nung inyakertemi anir Hindu nungertemi school raksatsü.

Ganj Basoda jila ya state yimtiba, Bhopal nungi kilometer 100 shi pilar lir.

Iba school nung azünger tanurtem Khristan yimsü dangi meypdaksür, ta tai tonglokja lokti jagi school raksatsü ajisüaka tanur shinga meyiru, ta Sub-Divisional Magistrate-i metetdaksü.

Osangbenertem den jembidang Sub-Divisional Magistrate, Roshan Rai-i, nun tem densema iba school nung inyakertem atema security lemzüksüogo, ta metetdaksü.

"Iba school jagi police yokogo. Tanurtem aser nun tem ajak junga lir. School temeket nung police ketdangsertema

aika lir," ta paisa metetdaksü. Osangbenertem den jembidang St. Joseph School Manager, Antony-i, ozü school nung azünger kaketshirtem Khristan yimsü dangi meypdaksür ta shidi ka prokshia liasü, aser iba nungji ajemdaker yimsü alia amangertemi school amak, ta metetdaksü.

"Ozü school nung azünger Hindu nunger kaketshir 8 Khristan yimsü dangi meypdaksüogo, ta nisung kari school tenüing amer shidi ka prokshia liasü. Shidi nung tenüing zülua aliba kaketshirtemji yangi mazünger. Shidi züluba anogoji Amongnü- October 31 ta zülua liasü. Amongnü asünung iba anogo nungji tesayurtem mesüra kaketshirtem shinga school-i maru. Item kaketshirtemji ozü school nung mazünger aser ni memetet," ta paisa metetdaksü.

"Ni iba osang ya Superintendent of Police aser District Magistrate nem-a metetdaksüogo, ajisüaka parnoki school amak," ta pai ashi.

Sub-Divisional Police Officer, Bharat Bhushan Sharma-i, school kümzüksü aser yangji inyakertem kümzüksü atema security peria lemzüksüogo, ta metetdaksü.

Hindu nunger lenir, Nilesh Agrawal-i, school nung kaketshirtem Khristan yimsü dangi meypdaksütsü merangra onoki ibaji nokdangtsü atema inyaktsü, ta amokmeren.

Bajrang Dal unit nung lenir, Nilesh-isa, school anema tai tonglokja alibaji jungjunga bushisüngdangtsüla, aser iba school nung azünger Khristan yimsü dangi meypdaksübaji shidak süra bulldozer amshia school ji bendoktsütsü, ta metetdaksü.

Iba tatalokba sülen National Commission for Protection of Child Rights-i Vidisha District Collector dang iba tatalokba bushisüngdangtsü tuyua liasü.

Long amshia school raksatsüba ken o dak sendakba nung Mongolbarnü Madhya Pradesh police-i nisung pongu puogo aser parnoki aibelenba putetra temerenshi agütsütsü.

Iran nung SC obendang ajanga Khristantemi teimla tasen ka angur

December 08, 2021: Tawa Iran nung Supreme Court-i, house church-i aoba ajanga Khristan kaji linük tsükchir mekümdaksür, ta obendang agütsüogo.

Iran linük nung Islam yimsü toktsür Khristan yimsü agizüker nisung 9 house church-i aoba atema küm pongu tepuokdak ayutsü obendang agütsüba sülen tang tepuokdak lir. Taoba ita iba ken o angadanga mapang nung Supreme Court-i, house church-i aoertemji linük tsükchirtem masü, ta obendang agütsü.

Khristan teku jagi linük security anema inyaker, ta tai tonglokja tepuokdak ayu.

November 3, 2021 nü iba ken o angadanga mapang Supreme Court-i, Khristan yimsü dangi meyipertem house church-i aoba ajanga parnoki linük security anema inyaker, ta tai metongloktsütsüla; Khristan

yimsü ajungkettsübaji linük security anema inyakba masü, ta metetdaksü.

"Khristan yimsü indang sayutsüngiba mesüra 'Evangelical Zionist' telok ajungkettsüba napronglaji kibongtem adenshiba (house churches) ajanga Khristan yimsü ajungkettsüba lir; aser ibaji linük security raksatsütsü atema masü," ta Supreme Court-i metetdaksü.

Supreme Court-isa, house churches tentetbaji Islamic Penal Code kübok Arrla 498 aser 499 na anema inyakba masü; item arrla ya linük anema nokdakba telok nokdangtsü atema dang lir, ta ashi.

Khristan tentet- Open Doors-i, Iran nung SC-i Arrla ana dak sendakba obendang agütsübaji pelaa agizüker, kechiyong item arrlanung ajemdaker aitsüba Khristan 20 dak tema tepuokdak balala nung

puoka lir, ta metetdaksü.

Open Doors partner aser Article 18 advocacy director, Mansour Borji-i, SC telemetbaji kanga tongtibang, kechiyong iba ya ajanga tarutsü nung Persia oshi jembir Iran nunger Khristantemi joko timtem majurutsü, ta ashi.

"Linük nung tematiba court-i agütsüba obendangji onoki pelaa agizüker. Supreme Court obendang nungji ajemdaker tang tepuokdak alir Khristan 9 prongla chioksüla," ta paisa ashi.

"Talisa iba obendang ajanga Iran tesem balala nung Khristantemi tang nungibo kecha tetsüba makai kidang lokti adenshir tekülem agitettsü," ta pai metetdaksü.

Paisa Iran ketdangsertem dang Persia oshi jembir Khristantem sadoksadoka tekülem agidaksütsüla, ta mepishia metetdaksü.

ANOGO ABEN TSÜNGREM DEN

Yisui takok nung tembanger ao

"Kechiyong shibai nenok dak mapa tajung tenzük, Pai Yisu Khrista anogo tashi ajisa abensatsütsü ta ni amanger" (Filipi 1:6)

Kechisarena ajak tatembang kati arur. Kaket shisatsü bushiba süshia, tejangrabatem, health aser tashi aser arishi. Ajak tatembang katibosa arur. Yisu Khrista-a Tebui tenyaba wadang ka atema iba limai aru (Yohan 6:38), aser tembanger takok nung ao. Pa sentsüwangshinung ayipa aobaji tebui tenyaba takok nung tembanger aoba indang angateter. Kechiyong Yisu-ia ashi "pei mulungba inyaktsü asoshi masü, saka tenyabai mulungba inyaktsü" ta shia lir. Adangji Yisu Khrista tatembangji takok nung tembanga indang angazüker. Tsüngremi asenok ajak sentong kaka nung yanglu, aser pa mesükba nung yangluba taküm shia jagi iba nükjidong atalokja tembangtsü Kibuba dang pa sentong asüngdangtsü nungdaker. Kechiyong koba mapa südir sang, ajak tatembang kati arutsü. Tenyar Paul-i Tsüngremer sentong tajungji tatembang kati takok nung bener arur ta meteta pai ashi, "shibai nenok dak mapa tajung tenzük, Pai Yisu Khrista anogo tashi ajisa abensatsütsü ta amanger." Asenoki tenzükba Tsüngremji tatembang aser alizüng dak ranglokba Tsüngrem ka lir. "Langka tetenzük dangbo iba tatembang i tajungba li r."

(Sayutsüngir 7:8). Yisu-i takok nung tembanga ama asenok koba mapa südir sang takok nung tembangtsü merangdi.

SARASADEM

Kibuba Yisu nai iba lima nung nungloktsüba wadang takok nung tembanga ama, nia takok nung ne tenyaba wadang takok nung tembangtsü ni yariangma. Amen

Church of England-i tang mezüng Khristmas ken ka sayaogo

December 08, 2021: Church of England-i tang mezüng Khristmas ken ka sayaogo aser iba ken ajanga Yisu Khrista asoba indang nisung aikati taliba jangjatsü imlar, ta metetdaksü.

Khristmas ken tasenbaji sabang aika nung sayaogo; carol ken ya 'In the Bleak Midwinter' ken version tasenba lir; Arogoi Classic FM den longjemmer iba ken sayar.

Tan ita nungsa Classic FM presenter, Alexander Armstrong-i radio nunga iba ken sayatsü.

Canterbury nung tongti putir, Justin Welby-i, "Khristmas mapang carol kentem atenba ya nisung aika atema sobaliba yimya ka lir, aser tang mezüng Church of England-ia iba ken adoktetba atema pelar," ta metetdaksü.

Paisa, "Khristmas nung Tsüngremi meimchir aküm. Pa melungjang arakzür. Temekong tzüngküm nung tanur kinü mezüng iba lima nung tangu

sashi. Tan mongpu nung asenoki sübotsü tajung sobur; itemji jangratemtsüka lir saka chichiba Khristmasji ibaji masü. Khristmas abensadaksübaji Yisu Khrista dang lir, shibai ajak angur, meimer aser agizüker. Asenoki Pa nem tagütsütsü ajak agi asen melungjang dang lir," ta metetdaksü.

"Na shiba südir süaka, kong lidir liaka iba Khristmas nung tanur kinü aser Tsüngrem külemtsü atema na-a jaoker," ta ken nungji shia lir.

Khristmas ken tasenba ya St Martin's Voices-i London nung aliba St Martin-in-the-Fields Tenla kidang record asü.

Iba ken ya Rebecca Dale-i mejem. 2015 küm lai mezüng choir aser orchestra atema adokba 'I'll Sing' ken ajanga iTunes Classical Single Charts nung temaba jengang ngua liasü.

'In the Bleak Midwinter' ya küm 150 tejaklen sangro ama zülua liasü.



December 08, 2021 nü Tamil Nadu nung Nilgiri hill district kübok Coonor anasa Indian Air Force indang Mi-17V5 helicopter tsükokba sülen tangokba noksa nung angur. Iba lendong nung Chief of Defence Staff, General Bipin Rawat aser pa kinüngtsü Madhulika Rawat na den sepai 11 süogo. Iba tayimtsü ya Sular IAF base, Coimbatore nungi Defence Staff College, Wellington-i aodang tsükok.

Asia nung tashi tulu linüktem rongnung India jenjang 4buba nung lir

New Delhi, December 08 (Agencies): Coronavirus wara ajanga Asia nung linük tulutiba ana- China aser India na tashi ajema aküm, ta Lowy Institute-i report ka ajanga metetdaksü. Kasa report ajangasa, Asia nung aliba linüktem jenjang mejunga kümaka US bo yimtenren inyakyim ajanga Indo-Pacific region nung ano tashi taitba kümogo, ta metetdaksü. Asian Power Index 2021 nung linük aser territories 26 asadanga liasü. Sydney nung amenoka aliba

Lowy Institute-i ashiba agi, lenla balala ajanga China tashi ajema aküm aser tangar dang nungi ano taliba pilaadok. Indo-Pacific Region nung tashi tulutiba linüktem mezümbuba jenjang nung US lir, tanabuba aser tasembuba jenjang nung Japan aser China na lir, aser jenjang pezübuba nung India lir. Coronavirus wara malidang linük renlokba den medemdangra iba wara ajanga item linüktem rongnung India tamajungtiba kongshia liasü. Kasa report ajanga ashiba agi, tesüiba küm ka nung

linüktem tsünga yimtenren inyakyim aser rongsenketsüng tsütsü tesendaktep densema kanga tongtibang lenla kar nung India jenjang mejungi aküm. Asia nung tashi tulu aliba linüktem den medemdangra taküm continent nung US ano jenjang tajungba aküm, aser ibaji Tir, Joe Biden-i aniba administration-i tanga linüktem den tesendaktep tajungba ayuba aser vaccine agütsüba ajanga wara agi kongshiba nungi kanga keraa tanaben asentenshiba aga lir, ta kasa reprt ajanga metetdaksü.

Kashmir nung Arlla 370 agienba sülen civilian 96 tepsetogo: Centre

New Delhi, Luchii/ December 08 (Agencies): Kashmir nung Arlla 370 agienba sülen civilian 96 tepsetogo aser securiy sepaitemi kiralongrar 366 tepsetogo, ta Bodhbarnü Rajya Sabha nung Centre sorkari metetdaksü. Minister of State for Home, Nityanand Rai-isa, "2019 küm August 5 nü Arlla 370 agienba sülen Kashmir valley nungi Kashmiri Pandit/Hindu shinga mejenshi," ta metetdaksü. "Ajisüaka tawa Kashmiri Pandit kibongtem, talisa Kashmir nung alir tetsür aser tanurtem

timba ser aika Jammu region-i ogo," ta pai metetdaksü. "Item kibongtem ya timbaka sorkar mapa inyakertem lir, aser asükwa mongpu nungbo ketdangsertem Jammu-i oa mapa inyaker aser asükwa mongpu nung shisaliok rejutem sodi anguba agi Jammu-i aoer," ta minister-isa metetdaksü. Ano tanga tasüngdangba ka langzüdang Rai-i, 2019 küm Arlla 370 agienba mapang nungi tenzüka taküm November ita tashi nung civilian 96 tepset, security sepai tepset asü aser kiralongrar 366 tepsetogo, ta metetdaksü.



New Delhi, December 08, 2021: Bodhbarnü asükwa mongpu Parliament tagidak mapang nung Parliament kima Kerala nungi MP temi longkak aitba noksa nung angur.

UP election: Priyanka Gandhi-i tetsürtem atema manifesto saya

Lucknow, December 08 (Agencies): Sangküm Uttar Pradesh nung assembly election agitsü lia Bodhbarnü Congress lenir, Priyanka Gandhi Vadra-i tetsürtem atema manifesto ka sayaogo. Manifesto nungji Uttar Pradesh nung lar party-i mapa tasen lakh 20 adokdaksütsü, aser iba nungjagi shilem 40 bo tetsürtem nem agütsütsü, ta nangzüka lir. Onük trok keta aliba manifesto 'Shakti Vidhan' sayatsüba sülen lai, state election nung Congress Party-i takok ngua sorkar kümra ration shops shilem 50 bo tetsürtem nem ketdangsdaksütsü, ta metetdaksü. Manifesto nung keta aliba onüktemji- 'swabhiman' (pei-akhümket), 'swawlamban'

(tangar dak memetaloki aliba), 'shiksha' (shisaliok), 'samman' (akhümket), 'suraksha' (security) aser 'sehat' (temang anema aliba) onüktem lir. Lucknow nung aliba Congress office nung manifesto sayatsüba sentong nung jembidang lai, Mahatma Gandhi National Rural Employment Guarantee Act (MGNREGA) kübok mapa shilem 40 bo tetsürtem nem shiteta agütsütsü aser shirnoki mapa nung tetsür shilem 50 anikdir parnok dang saru memeshitsü, ta nangzüok. "Uttar Pradesh nung mapa inyaker tetsürtem aika akümsü aser tetsür o tebur na bendanga züngshiba ajema akümsü atema Congress party-i state nung mapa lakh 20 adokdaksüba nungjagi tetsürtem nem shilem 40 agütsütsü," ta lai

metetdaksü. Tang aliba reservation telatetbatem nung ajemdaker public transport driver mapa ama teburtemi inyakba mapa balala tetsür nem-a lezmüksütsü aser iba atemaji tetsürtem atema training centres lapoktsü, ta lai metetdaksü. Kasa sentong nung jembidang Congress party otongdar, Supriya Shrinete-i, "Iba ya manifesto ka dang masütsü aser iba ya ajanga tanga party temia yimtenren nung tetsürtem nem shilem agidaksütsü atema süoki ia agitsü," ta metetdaksü. Tamalen Congress-i taruba assembly election nung party ticket shilem 40 bo tetsürtem nem agütsütsü, ta nangzüka liasü.

TMC aser Congress na longjem-daktsütsü merangtsü: Nawab Malik

Mumbai, December 08 (Agencies): Maharashtra nung minister aser Nationalist Congress Party (NCP) lenir, Nawab Malik-i, taruba Lok Sabha General election atema Third Front tentetsü asoshi ano jembishinü metenzük, ta metetdaksü. Paisa, BJP tamakok ngudaksütsü atema NCP Tir, Sharad Pawar-i Mamata Banerjee-i aniba Trinamool Congress aser Congress densema BJP nung madenba party temi opposition teloktep ka tentetsü merangtsü, ta metetdaksü. Delhi nung NCP National Executive senden amenba sülen osangbenertem den jembidang pai item osang ya metetdakja liasü. Tawa Trinamool Congress tongti aser West Bengal chief minister Mamata Banerjee-i United Progressive Alliance (UPA) dak sendakba olen ka jembiba aser Congress lenirtem aitsüba den külemi linük jenjang nung front ka tentetsü jembia liasü. Malik-i, "Sharad Pawar dak tashi tulu lir. Pai Maharashtra nung Shiv Sena aser Congress na sabang ka nung longjemdaksür sorkar kümtetra pai linük nunga BJP nung madenba party tem sabang ka nung longjemdaksütetsü aser BJP tamakok ngudaksütsü atema opposition teloktep tashi itta tentetsü akoktsü," ta ashi. Paisa, BJP nung madener

party ajak longjemdaksütsü atema NCP-i merangtsü, ta ashi. Sangküm küm tetenzüklen state pongu nung asembly elections agitsü aliba dak sendakba nung pai, "State shia nung tanga party temi tashi itta aliba party pusemstsüla," ta ashi. "Uttar Pradesh nung NCP-i Samajwadi Party pusemer aser Goa, Uttarakhand, Punjab aser Manipur state tem nung onoki Congress pusemstsü atema jembidar," ta paisa ashi. UPA nungji Mamata Banerjee dendaktsütsü asü?, ta asüngdangba langzüdang Malik-i, UPA teloktep nung TMC dendaktsütsü atema Mamata Banerjee den jembitsü aser iba teloktep ya Sharad Pawar-i lenitsü, ta metetdaksü. "Maharashtra nung Shiv Sena aser Congress na longjemtetra NCP-i iba nungji shilem agitetsü, yamaji Mamata Banerjee den-a jembitetsü," ta pai ashi. Linük nung osettsüset jenjang atuba, mapa manguba tebilemstsü aser tetsübu lir, ibayongji linük nüburtemi tashitait sorkar ka aginer, ta pai ashi. NCP National Executive senden nung osettsüset jenjang tali atuba, mapa manguba tebilemstsü, aluyimertemi longkak aitba, Supreme Court-i Maharashtra nung OBC reservation thinentsüba aser state pongu nung asembly elections agitsü aliba onüktem nung o lemtepa liasü.



December 08, 2021 nü Parliament House, New Delhi nung Congress Parliamentary Party (CPP) senden amenba sülen Congress Party lenirtem- Rahul Gandhi, KC Venugopal aser Deepender Singh Hooda nunger maneni nüngdak kar jembiba noksa nung angur.



The White House ajanga agütsüba noksa ka nung Tir Joe Biden-i Russia Tir Vladimir Putin den virtual yimya nung Washington nung aliba White House indang Situation Room nungi jembiba angur. Kasa noksa abelen tezülen White House national security adviser Jake Sullivan den Secretary of State Antony Blinken, achichilen national security council senior director for Russian and Central Asia, Eric Green nungertem angur.

Bangladesh nung nisung 20 nem tasüba temerenshi agütsütsü

Dhaka, Luchii/Dec. 08 (Agencies): Social media nung sorkar aitsüba atema külem kaketshir ka tepsetba mechi Bangladesh nung aliba court kati university nung azünger kaketshir 20 nem tasüba temerenshi agütsütsü aser ano par pungo takum tepiyong tepuokdak ayutsü obendang agütsü.

Sorkar tenteta aliba Awami League party indang student wing, Chhatra League züngsem aser Bangladesh University of Engineering and Technology (BUET) nung azünger par 25-i BUET nung kümnabuba azünger arishi küm 21 tain Abrar Fahad October 7, 2019 nü zükseta liasü.

Fahad tepsetba mechi linük tesem ajungalen kaketshirtemi longkak aita tim obendang agütsütsü takangba agütsü.

Bodhbarnü iba temerenshi metetdaksüba mapang Dhaka Speedy Trial Tribunal-1 nung Judge Abu Zafar Md Kamruzzaman-i, "Court ajanga parnok tem temerenshi tematiba agütsür, anungjidang tarutsü

nung iba ama lendong tulu mataloktsü," ta ashi.

"Aibelenba dak alang tesashitiba nung obendangba indang noklang nok tatem tashi amshitsü asenoki nungnanga malitsü ta bilemer," ta pai ashi.

Iba obendang ajanga ni pelar, ta Fahad tebu Barkat Ullah-i court kima osangbener dang ashi.

"Kü jabaso meyipa mangutsü saka iba obendang yagi ozü kibong nem molung süngzük tera agütsür. Parnoki kechi inyakogo, ibaji atema parnok tekeratiba nung merenshitsü imlar," ta pai ashi.

Iba obendang ya anema jembitsü merangtsü, ta defence lawyer rongnung Faruk Ahmed-i osangbener dang ashi.

India den tzü lemsatepa agitsü tezüngzüktep yangluba atema Fahad-i Facebook nung Sheikh Hasina-i aniba sorkar aija liasü.

Ayong tzü tem lemsatepa agitsü atema Dkaha aser New Delhi küm aika tezüngzüktep meyangluteti aru. Ganga ayong

nungi tzü lemsatepa agitzü tezüngzüktep ka agiba ya Bangladesh-i India atema inyaksüba ama aikati bilemer.

Fahad-i züluba ya social media sapang nung nisung aikati lemsatepa university nung aliba Chhatra League züngsemtemi pa jaoka liasü.

Security camera nungi tangokbatem social media nung lemsatepba nung pa activist kar den dormitory len jaja aoba angu. Dormitory nung aliba takdang nung activist temi pa den asüngdangya asü.

Fahad dak cricket bat kati azük aser lisü agi ghonda aika alena ayu, ta court indang kuli kaket tem ajanga ashi. Iba sülen Fahad temang ya dormitory indang staircase nungi tsükdaksü aser tasüngji doctor temi pa süogo, ta sangdong.

Iba sülen police temi pa tepsetba nung shilem agir nisung 21 apu aser ano temolung melemi alir ka pasasa arua nangzük. Iba ken o nung tai tonglokja alir nisung asem tang tashi jenshia senzür.

Germany chancellor atema Olaf Scholz shimogo

Berlin, Luchii/Dec. 08 (Agencies): Olaf Scholz ya Germany indang chancellor tasenba inyaksü tezüngzüktep agiogo, shibai küm 16 sülen Angela Merkel melenzüka party asem agi akumba sorkar anitsü.

Pa ya German parliament nung shimtet, kong par coalition nung züngsem timba lir.

Par centre left Social Democrats yagi Greens aser business-friendly Free Democrats den külemi yimsü asütsü.

Pa nem tashi melenzüksüba yagi Merkel küm 31 tashi yimtenren nung shilem agia aruba tatembang kati arur.

Osü tanük jembisang arishi küm 63 tain Scholz-i anir September ita tatemlen Social Democrats temi election nung takok ngua pa ya chancellor atema candidate tejangja ka akum, kechiaser Merkel'er sorkar nung pa ya vice-chancellor ka ama tongti shilem agia aru.

German parliament, Bundestag nung züngsem 395-i pa nem vote agütsüba sülen pa teka maa agizüka liasü.

Parliament nung vote agitepba sülen Bundestag Tir Bärbel Bas-i pa dang pa shimba agizüker asü masü ta asüngdangba mapang "hao" ta pai langzü.

Iba sülen pa Tir Frank-Walter Steinmeier ajurui ao aser iba sülen tezüngzüktep agia liasü.

Election agiba sülen par party yagi Greens aser Free Democrats den teloktep tezüngzüktep ka nung mapa inyaka aru, koba Mongulbarnü meyongnem agüja liasü. Pai nikongdang 3:00 ako (par mapang) nung Merkel melenzüksü sentong lir.

Sorkar tasenba yagu tekeratiba nung mijang amshiba yutsür tzü mopung

melendaksüba anema raratsü sentong lir aser renewable energy nung temolung agütsür, saka parnok atema mezüngbuba meraji coronavirus tashidak wara azioktsü ya lir. Health ketdangsurtemi tesüiba ghonda 24 tsüngta COVID-19 cases 69,601 jangjateta lir, aser nisung tasüba 527 liasü, koba taoba mongpu sülen timtiba alitsü.

Pa aser foreign minister akumsang Greens lenir Annalena Baerbock nati Russia mitkartem Ukraine den arütsülen adenshiba ajanga tsüba aliba atema telangzüba agütsütsüla akumtsü.

Russia-i par kidanger amaktsü sentong mali ta shiaka Russia rongsenketzung nung kanga jangja aser sashia kongshitsü atema telangzüba agütsütsü asoshi Angela Merkel-i US Tir Joe Biden aser ano UK, France aser Italy lenirtem den Mongulbarnü molungtepa liasü.

Rongsenketzung tsütsü temetetba mera kaji Germany-i yokba Russia indang Nord Stream 2 gas pipeline ya lir, koba renemer saka Germany energy regulator nungi temelaba angutsü ata lir. Iba pipeline ya shibangtsü atema Germany den angatetepogo, ta US ketdangsurtemi ashir.

1990 küm December ita mezüng shimtetba sülen idangjisa Angela Merkel nem Chancellor Helmut Kohl-i minister mapa agütsü.

Saka la teyari nung pa atsüngdoker 2000 küm Christian Democrat lenir akum aser 2005 küm November ita la chancellor akum.

Communist East Germany nung tashi tulutiba tetsür ta mapang ka züngshiba Margot Honecker-i Bundestag anasa mapang ka amshiba ki nung la office alitsü.

Khashoggi tepsetba ken o nung France-i nisung tai apu: Saudi Arabia

Riyadh, Luchii/Dec. 08 (Agencies): 2018 küm osangbener Jamal Khashoggi tepsetba ken o nung shilem agia lir ta temolung melemi Saudi senso ka France-i apuba ya aibelenba lir ta amanger, ta Saudi ketdangsurtemi ashi.

Turkey-i aputsü metetdaksüba nung ajemdaker arütsü anükba police temi nisung ka apu, shiba Paris nung aliba Charles de Gaulle airport nungi Riyadh-i tayimtsü nung aotsü liasü, ta judicial aser airport osang ajanga ashi.

Khalid Alotaibi tenüing nung passport bena alisang ya shidakba nunga Khashoggi tepsetba mechi Turkey-i temolung melemi bushisang aser US-i tenokdangba agüja alisangji asü masü, ta jangjatsü atema Mongulbarnü bushisingdang temi bushia

liasü. Paris nung aliba Saudi embassy ajanga sangdong ka agütsüba nung, pua alisang ya iba ken o den kecha nunga sendaktepa mali ta ashi aser tekeraba nung chiochtsü takangba agütsü.

Khaled Alotaibi ya linük nung kanga bulua ajaba tenüing ka lir aser France-i bilemba Alotaibi ya Saudi Arabia nung iba ken o nung dena alir ajak den külemi tepuokdak lir, ta Saudi Arabia nung security osang ka ajanga ashi.

Khashoggi tepsetba ken o Turkey-i 2020 küm October ita jembiba mapang met pur meliaka Saudi nung nisung 26 aitsüba rongnung nisung ka tenüing agi Khalid Alotaibi liasü. Iba ken o nung pa aitsüra takum tepiyong tepuokdak ayutsü.

Turkey nung metting

melika ken o jembir par 26 rongnung nisung ana taoba mapang Saudi Crown Prince Mohammed bin Salman (MBS) den yariteper liasü. Nisung tepsetba mechi Turkey nung ken o jembidak Saudi ketdangsur kata tsüngtong oa maden.

Nisung tepsetba asoshi 2018 küm US Treasury ajanga tenokdangba agütsütsü atema sangdongba nisung 17 rongnung Alotaibi ya ka lir.

Turkey-i mepishiba ama Interpol Red Notice ajanga sangdongba mapang nisungba ya passport control ajanga aorba liasü, ta osang ka ajanga ashi.

Pa tali tejangjaba metettsü aser shidakba pa aputsü totuyuba agütsü asü masüar metettsü atema Mongulbar nikongdang jangjashiba mapang liasü aser pa ya ghonda 48 tashi

pua ayutsü akok, ta osang ka ajanga ashi.

Nisung tepsetertem rongnung züngsem ta jangjatetra pa ya French prosecutor matsüngdang nokdaksü.

Pa Turkey nung anir oa ken o jembitsü aliba anema nokdaksü pa dak temeden lir. Pai yamaji inyakra, Turkey-i mepishiba ama meinyakdang pua atatsü asü mesüra France yutsür maotsü züngzükteper chiochtsü ta French judiciary ajanga telemteba agitsü.

Pai aginüba ama masü Turkey nem agütsütsü asoshi obendang agütsütsü atema court kati hopta ishika mesüra ita ishika agitsü.

Saudi Arabia nung kishi shibanger ken o jembiba sülen nisung pungo nem tasüba temerenshi agütsütsü obendang agüja liasü, saka 2020 küm

September ita Saudi court kati iba obendang melenshija parnok ya küm 20 tepuokdak ayutsü obendang agütsü.

Iba obendang ya UN ketdangsur aser human rights campaigner temi aitsü aser nisung tepsettsü tasa yanglusang tang tashi pua mali, ta ashir.

"Jamal Khashoggi atema obendang agütsütsü inyakba nung ibai lenmang lapoker ka asütsü akok," ta taoba mapang UN investigator inyaka alisang Agnes Callamard-i Paris nung pua aliba indang ashi.

Khashoggi tepseta temang ransa indoker Saudi Arabia-i aoba Saudi nung telok nung Alotaibi ya dena lir, ta Callamard-i 2019 küm United Nations atema report agütsüba nung shia liasü.

(Maneni tapak 9 nung...)

MULUNGNEN O



Onoki teti meima aliba asür **Longchenti Aier**, mapang tatsüka temang manemi alidang, aser pa akümüli wadang tembangba tashi kija, kibong, sosem dangsemer, kiyonger, medem sor, Arogo aser lokti tentet balala shirnokisa sarasadem den nübu aser rongsen agi ozü asüko mapang nungita yariogo, nenok ajak dang pelaba lemsateper.

Onoki nenok temeim aser teyari meyipa agütsüsü makoker saka asen takarsang Tsüngremi nenok ajak talubosa moajangma ta ozü tamang sarasadem.

Temeim kinungtsü, tzürabur aser kinungertem.

LEARN FROM PROFESSIONALS

Beauty, Hair, Makeup, Knitting, Crochet,
Flower Making & Jewellery Making

Contact No. : # 9717288352 ; # 9971581223



AVAILABLE NEUROPSYCHIATRIST

For Consultation

Dr. Ayangla Longchar, MBBS, DPM

Central Institute of Psychiatry, Ranchi

Monday to Friday 9 AM to 4 PM

Saturday 9 AM to 1 PM

For registration, call 03862-232032 / 248285

4th Supongmeren Memorial Volleyball Trophy

Venue : Molungkimong, Dist. Mokokchung

Date : January 11-12, 2022

Prizes : Champion - Rs. 50,000 with Trophy & Certificate
Runners Up - Rs. 30,000 with Trophy & Certificate
3rd Place - Rs. 20,000 with Certificate
4th Place - Rs. 10,000.

Individual Prizes : Best Spiker, Best Setter,

Best Disciplined Team etc.

Entry Fee: Rs. 3000 (per team)

Last date of registration: January 5, 2022

Sd/-

Sd/-

P. Imti Aier
Convenor, SMVT
9383014469

Maki Ozukum
Secretary, SMVT
7005700719

Khashoggi tepsetba...

(Tapak 8 nungi...)

Lai report agütsüba nung shia aliba nisungba ya France nung pua alisang asü masüar tali tejangjaba nungdaker, ta lai ashi.

Khashoggi ya Saudi senso tejangja ka liasü, shiba United State nung oa jenoka ali aser The Washington Post osangkaket atema zülu. Pa ya tetong Turkish tsür den kibong akümsü atema zülubanglu kar asoshi October 2, 2018 nü Istanbul nung aliba Saudi consulate telungi ai.

Saudi nunger pa tepsettsü ata alirtemi pa lenset aser pa temang ya anüka rangsa, ta US aser Turkey ketdangsürtemi ashi. Pa temang ya tanaben mongutet.

Pa tepsetba atema alima ajungai ola adok aser tang tashi iba tejashi mesamai lir, aser

anüolen linüktem nungi itdangiter temi pa tepsettsü atema Saudi Arabia lenir MBS ajanga totuyuba agütsü, ta aitsür.

France Tir Emmanuel Macron-i Gulf linüktem sema jajatsü aliba nung Saudi Arabia adentsü telemteba agiba nung pai iba linük semdangba ajanga Khashoggi ken o amadokba masü ta sangdonger anogo ishika lir Mongulbarnü iba nisung ya apu.

Khashoggi tepsetba sülen anüolen linük tulutem nungi leniri Saudi Arabia semdangba Macron ya mezüngbuba alitsü.

Khashoggi tepsettsü atema Saudi sorkar indang jenjang tematiba nungi totuyuba agütsü, ta Turkey Tir Recep Tayyip Erdogan-i ashi saka pai indang-indanga MBS tenüng masen.

Agri Dept-i State Agriculture portal (SAP) amenokogo

Kohima, Luchii/December 8 (TYO): Department of Agriculture-i, December 8 nü Directorate of agriculture conference hall nung State Agriculture portal (SAP) nagafarmer.nagaland.gov.in amenokogo.

Iba sentong amenoktsüba sentong nung o jembiba mapang Director of Agriculture M. Ben Yanthan-i, Nagaland State Agriculture SAP amenoka, aluyimertem aser aluyimba loktitem nem tajangzük agütsüsü atema department bendanga agütsüshir, ta ashi.

Yanthan-i ashiba agi, State Agriculture Portal ajanga website aser application aika semdangtsü melena access point ka nungi dang sorkar osangtem aser aluyimba sector dak sendakba nung service balala indang osang agütsüsü. SAP yagi single consolidation browser view ka nung osang aser service tem agütsüsü aser iba den online resource aser interactive service balala agütsüsü.

Maneni Yanthan-isa, information Technology (IT) amshia shisatsü agi manüngba lokti ka tentetsü Agriculture department nükla lir aser iba portal ajanga alima ajunga nung aliba aluyimertem,



Agriculture Director den tanga department ketdangsürtem tangokba noksa nung angur.

shishilembartem aser nüburtem-i button ka nung dang anemba ajanga IT tajangzük agitetsü, ta ashi.

SAP amenokba nükjidongji, information technology ya sorkar aser aluyimertem tsüngda, aluyimertem aser shishilembartem tsüngda aser ano sorkar aser nüburtem tsüngda tesendaktep tajungba küma yanglushitsü atema lir, ajita asünungdang osang belentepba temelaba akümsü aser agriculture services mela mela takaratiba nung agitetsü aser iba ajanga state nung aluyimertem atema sustainable aser progressive farming system ka amenoktetsü, ta paisa ashi.

SAP amenokba ajanga local indigenous farm products aser

Farmers Market advertise asütsü atema maongka agüja aluyimba jenjang ajungketsü asoshi lenla ajak nung atsülangshitsü aser Agriculture Department aser IETC, SARS, KVK, Agri Expo, ATMA, Farmer Corner amala tanga unit tem indang inyakyim osang agütsüsü.

SAP amenokba sentong nungsa Director of Agriculture Ben Yanthan-i, department "News Letter 2020-2021" sayaa liasü. Maneni Ramietech Solutions, Kohima-i, sentong nung SAP indang technical report agütsü.

Iba sentong ya Addl. Director of Agriculture S. Kivikhu Achumi lenisüba nung agi aser SMS, IT Nodal Ronchamo Kikon-i tepela anküp o jembia liasü.

GHSS, Kiphire nung EDC semzüktsüogogo

Dimapur, Luchii/December 8 (TYO): Kiphire Deputy Commissioner, T Wati Aier-i December 7 nü GHSS, Kiphire nung Entrepreneurship Development Centre ka semzüktsüogogo. Iba sentong nung Joint Director Industries & Commerce, Youth Net Kohima, DEO aser GHSS Staff temi shilem agia liasü.

O tatsüka jembiba mapang Aier-i, kaketshirtem dang iba centre ya takok tashi amshitsü aser pei taküm nung education ya mezüng sükdaktsüsü ajungshi. Paisa, skill development ya lanurtem dang skill aliba bushiteta training agütsüba aser parnok nem

employment tajangzük agütsüba lir, anungji EDC ajanga kaketshirtem aser mapa mongui alirtem ajangzükdaktsüsü ta ashiba den pai tarutsü nunga iba ya kanga shisa kaa amshitsü mepeshi.

Kasa mapang nung Joint Director, Industries & Commerce, Lipongse Sangtam-i, state nung alirtemi entrepreneurship ya kechi aji mejangjaba atema sasa bilemba olen ka lemsatep. Paisa, nisung aikati business tulu dang tenzükner aser tamakok angur ta ashi.

Sentong nung DC-i kaketshirtem dang EDC-i

agütsüba maongkatem agitsü aser tarutsü dak rangloker renemtsü ajungshi. Pai, nisung kari danga tejangja institution tem nungi online entrepreneurship development course aginüa lira, parnoki angati agi course agitetsü ta ashi.

Maneni Sangtam-isa, kaketshir ajak dang iba maongka ya agitsü ajungshi, kechiyong department-i lenla ajak nung parnok senotsü agi nongita yaritsü, ta ashi.

Kasa mapang nung EDC indang Youth Net Kohima-i lemsatepa liasü. Iba sentong ya S. Imtinaro lenisüba nung agia liasü.



Mon district kübok Oting yimdak Indian sepoy-temi tai maket nisung aika tepsetba atema mang yima aser mulungku tamaittsü sayua All Nagaland Taxi Association (ANTA) Mokokchung Unit züngsemtemia Mokokchung town nung taxi-tem nung wako tanak songer jajaba noksa nung angur. Nagaland ajunga nung ANTA-i mulungku wako ya Dec 10, 2021 tashi asongtsü ta osang ajanga metetdaksü. Mokokchung, 8th December, 2021.

ICC Test Rankings: R Ashwin No 2 kumogo



Dubai, Luchii/December 8 (Agencies): Bodhbarnü sayaba ICC Test Rankings nung India nung spinner Ravichandran Ashwin tanabuba jenjang nung aliba sayuogo. Kasa mapang nung kulem India nung asayar Mayank Agarwal aser New Zealand nung spinner Ajaz Patel nata temaba jenjangi tuogo.

Mumbai nung tanabuba Test asayaba mapang Agarwal-i innings ana nung khen 150 aser khen 62 yangluba sülen pa jenjang 30 tejakdangi tua tang 11buba nung lir.

Pai 2019 kum November ita jenjang 10buba tongta tuteta lir

asertang iba jenjang spot ka agi dang metongteti lir.

Mumbai nung asoba asayar Patel, shiba Test innings ka nung wicket 10 prongla agiba asayar tasembuba akum, pa jenjang 23 tejakdangi tua 38buba tongtetogo. Pai asaya ka nung wicket 14 agia liasü. Tang tashi nung Jim Laker aser Anil Kumble nati dang innings ka nung wicket 10 agir liasü.

Left-arm spinner yagi taoba mapang jenjang 53buba tashi dang tongteta lir. Iba asayamung metenzük tsungda pa jenjang 62buba nung liasü.

Mumbai nung Test asayaba sülen temaba jenjangi aturtem

rongnung India opener Shubman Gill (jenjang 21 tejakdangi tua 45buba), fast bowler Mohammad Siraj (jenjang 4 tejakdangi tua 41buba) aser New Zealand batter Daryl Mitchell (jenjang 26 tejakdangi tua 78buba) nung densema lir.

Mumbai Test nung innings anaprongla nung wicket pezüzü agiba sülen Ashwin tanabuba jenjangi tuogo aser temaba jenjang nung aliba bowler Pat Cummins tera agi dang memenep lir.

Ashwin-i rating point 43 angu aser pa tasembuba jenjang nung alisang Josh Hazlewood dang nungi point 67 agi timba lir.

All-rounder tem rongnung pa jenjang ka tejakdangi tua tanabuba nung lir. All rounder tem rongnung West Indies nung asayar Jason Holder temaba jenjang nung lir aser Ravindra Jadeja jenjang pezububai asepzüka aluogo.

Batsmen tem rongnung India nung rongnung Rohit Sharma (Mumbai Test masaya) aser Virat Kohli (0 aser 36) na jenjang maseshi pongububa aser trokbuba nung lir.

Borlengri ASU-i ayongba asayamung thinener

Dimapur, Luchii/December 8 (TYO): December 4 nü Indian Security Force temi tai maketba civilian 15 taochi makai tepsetba dak sendakba nung asürtem nem akhüm tetushi agüja, Borlengri Ao Students Union-i ayongzüker aliba Open Amateur Men's aser Veteran's Badminton Tournament thinenba

ketdang sürtem i metetdaksüogo. Iba asayamung ya December 9 nungi 11 tashi asayatsü renemer liasü saka tang 2022 kum January 6 nungi 8 tashi asayatsü telemtetba agiogo, ta Planning Committee Convenor K Manen Imsong aser tir Limakum nati sangdong ka ajanga metetdaksü.

Ash Barty-i WTA Player of Year narokum agizükogo



Luchii/December 8, 2021 (Agencies): Takum Wimbledon asayamung akokba den No. 1 jenjang nungi masetshi kum tembangba sülen Ash Barty nem takum agi kümnabuba WTA Player of the Year narokum agütsüogo. Iba osang ya Mongolbarnü sangdonga liasü.

Barbora Krejckova nem Most Improved Player narokum agütsü aser laisa kulem tarep asayar Katerina Siniakova den Doubles Team of the Year award agizüa liasü. 2000 kum sülen takum mezüngbuba Krejckova-i French Open nung kija aser tarep asaya na prongla kokogo.

Arishi kum 18buba nung Emma Raducanu nem Newcomer of the Year narokum agütsüogo. La ya qualifying round nungi tur Grand Slam title ka akokba mezüngbuba asayar lir.

Kasa mapang nung Carla Suárez Navarro nem Comeback Player of the Year narokum agütsüogo. La Hodgkin's Lymphoma tashidak

agi tonger temang anepaluba sülen tanaben meya arua asaya aser Billie Jean King Cup finals nunga Spain tenung nungi asayaogo.

Barty-i 2019 kuma WTA Player of the Year narokum agizükogo. Iba season nung lai title pongu koktetogo, kong All England Club nung Grand Slam championship tanabuba akokba densema lir.

Arishi kum 25 tain Australia tsür la ya takum agi season asembuba No. 1 jenjang nung season tembangogo.

2021 kum kija asaya nung asayamung asem makok tsungda Krejckova-i kija asaya nung asayamung ka danga koker maliasü. Lai akokba asayamungtem nung Roland Garros densema lir. La 2020 kum kija asaya ranking nung jenjang 65buba nung liasü aser No. 3buba tonga tuogo.

Krejckova aser Siniakova na nem tang agi kum anabuba Doubles Team of the Year narokum agütsüogo. Tenati takum French Open aser WTA Finals akok aser Olympic nunga gold medal ngua liasü.

SAFF U-19: Indian Football team Dhaka-i apusoago

Luchii/December 8, 2021 (Agencies): SAFF U-19 Women's Championship nung tokteptsü atema India U-19 women's football team Bodhbarnü Dhaka-i ogo. Parnok mezüngbuba asaya December 13 nü Sri Lanka den asayatsü.

India tetsür team ya Goa nung training agia liasü aser head coach Alex Ambrose-i, camp akaba ajanga tetsürtem tajungba asayatsü atema teyari agütsütsü amanger, ta ashi. "Onok Goa nung training agiogo aser tetsürtemi asaya yimya ajak den liromedema asayatetogo," ta Ambrose-i team mapuso tsungda ashi.

"Alima nung alirtem ajak atema timtem mapang ka lir saka onok training agütsü aser asayatsü maongka anguba atema ni kanga pelar. Onoki junga asayaner aser imlaba ama asayatetsü asoshi federation-i onok nongita yaridar,"

ta Ambrose-isa shisem.

U-19 team ya team tasen ka aser national team nung asayar ishika dang densema lir. SAFF asayamung nung shilem agiba ajanga tetsürtemi international arena nung asayaba football jenjang indang tali tajungba angatetsü, ta Ambrose-i ashi.

"Onok team ya team tasen ka aser ajaki junga asayatsü atema yongyatepdar. Team tajung den asayaba ajanga parnok ajangzüksü aser International football tajungba angatetsü. Asayartemi peisasa dak tamang akatsüla aser junga asayatsü nungdaker," ta pai ashi.

"Iba ajanga tarutsü nung tetsükdaksütem ajangtetsü atema parnok renemtsütsü.

Timla aika lir saka onoki football junga asayatsü dang meranger. Asayartem pressure kecha mali. Onoki parnok jangradema asayadaksüner,"

ta Ambrose-i ashi.

India team tanabuba asaya Bhutan den December 15 nü asayatsü aser iba sülen Bangladesh (December 17) aser Nepal (December 19) den round-robin format ka nung asayatsü. Temaba jenjang nung tembangba team ana final December 22 nü asayatsü.

Team nung asayartem:

Goalkeepers: Anshika, Adrija Sarkhel, Manju Ganju.

Defenders: Astam Oraon, Nisha, Nirmala Devi, Purnima Kumari, Shilky Devi, Ritu Devi, Kritina Devi.

Midfielders: Poonam, Nitu Linda, Babina Devi, Santosh, Priyanka Devi, Mariyammal Balamurugan, Anju.

Forwards: Karen Estrocio, Amisha Baxla, Lynda Kom Serto, Sumati Kumari, Apurna Narzary, Santhiya Nadupatti Venugadajalam.

Australia-ia 2022 Beijing Winter Olympics nung shilem magitsü lemtet

Luchii/December 8, 2021 (Agencies): United States-i telemtetba agiba ama Australia-ia Beijing nung Winter Olympic Games nung shilem agitsü atema ketdang sürtem meyoktsü telemtetba agiogo, ta Ato Kilonser Scott Morrison-i Bodhbarnü ashi. Iba telemtetba agiba ajanga linük ana tsungda tang tesendaktep mejungi aliba tamajungba kumshitsü akok.

United States-i Hombarnü ashiba agi, China-i human rights inyakyim nung aibelenba atema sorkar ketdang sürtemi Beijing Olympics nung shilem magitsü. Linük ana tsungda

tesendaktep yanglushitsü atema sensak asemba sülen hopta ka shi dang lir US-i iba telemtetba agia liasü.

Kasa mapang nung China-i, iba telemtetba agiba atema US anema jenjang tapet agitsü, ta shiogo.

T e k ü m d a n g t s ü metetdaksü Morrison-i ashiba agi, taruba Winter Olympics nung Canberra-a diplomatic boycott nung adentsü.

"Australia sorkar ketdang sürtem iba asayamung atema China-i maotsü. Ajisüaka Australia nung asayartembo aotsü," ta Morrison-i Sydney

nung osangbenertem dang ashi.

Morrison-isa, Xinjiang nung human rights inyakyim nung China-i aibelenba dak sendakba nung sensaksem mesütetba aser Beijing-i Australia nungi yokba osettem meyilongi kümdaksütsü aser nokdangtsü merangba atema Australia-i iba telemtetba agi, ta ashi.

Kasa mapang nung Australian Olympic Committee-i ashiba agi, diplomatic boycott ajanga Australia nung asayartem dak mekongshitsü. Winter Olympics nung Australia nung asayar 40-i oa asayatsü imlar.

BILEMDANGANG

"Tetenlar teka meshitetaka tamshir teka menena lira ajak amajok."